

# Universidade de Vigo

## Regulamento de Titorías

### da Escola de Enxeñaría Aeronáutica e do Espazo

Aprobado na Xunta de Titulación, na sesión do 17 de xuño de 2016.



Escola de Enxeñaría Aeronáutica e do Espazo  
Edificio Manuel Martínez-Risco (Pavillón 3)  
As Lagoas s/n  
32004 Ourense

<http://aero.uvigo.es>  
<mailto:aero.info@uvigo.es>



Referencia: 1.00  
Documento: reti  
Data: 22/06/2016  
Páxinas: 4

*Preámbulo*

1. O Real Decreto 1791/2010, de 30 de decembro de 2010, polo que se aproba o Estatuto do Estudante Universitario dispón no seu artigo 21, que regula as Titorías de materia, que os estudantes serán asistidos orientados, individualmente, no proceso de aprendizaxe de cada materia do seu plan de estudos mediante titorías desenvolvidas ao longo do curso académico. Así mesmo establécese que *as universidades, a través dos seus centros e departamentos, garantirán que os estudantes poidan acceder ás titorías, establecendo os criterios e horarios correspondentes.*
2. Os Estatutos da Universidade de Vigo, no artigo 65, dispoñen que o decano ou decana ou director ou directora do centro, asistido polo seu equipo de goberno, é responsable da dirección e xestión do centro e entre as súas funcións inclúese a de ter conta do cumprimento dos horarios docentes e de titorías.
3. O Regulamento de Profesorado da Universidade de Vigo, no seu artigo 2, que regula os Compoñentes da actividade do PDI establece que *a actividade docente do PDI consta de docencia presencial e non presencial, teórica e práctica, incluíndo a súa preparación, do material docente e das probas de avaliación, as titorías e outras actividades docentes. As obrigas docentes anuais serán as establecidas na lexislación vixente.*
4. O Real Decreto 898/1985, de 30 de abril de 1985, fixa para o profesorado con réxime de dedicación a tempo completo un período de seis horas de titorías ou asistencia ao alumnado e para o profesorado con réxime de dedicación a tempo parcial, entre un máximo de seis e un mínimo de tres horas de titoría e asistencia ao alumnado.
5. O Regulamento de Estudantes da Universidade de Vigo no seu artigo 22, *Das titorías*, garante o dereito do alumnado *a ser asistido e orientado individualmente e durante todo o curso académico no proceso de aprendizaxe mediante titorías no centro en que se lle imparte a docencia, sempre que sexa posible. Para tal efecto os departamentos deberán publicar e facerlle chegar ao alumnado, a través dos medios de información do centro e antes de comeza-la docencia, os horarios e os lugares de titorías do profesorado, que se adecuarán no posible ós diferentes grupos existentes.*

En virtude do antedito, elabórase a presente normativa interna da Escola de Enxeñaría Aeroespacial e do Espazo reguladora das titorías, consonte as seguintes disposicións:

**Artigo 1. Obxecto**

A presente normativa ten por obxecto regular diferentes aspectos relativos á ordenación dos horarios de titorías no ámbito de competencias da Escola de Enxeñaría Aeroespacial e do Espazo.

**Artigo 2. Dereito as titorías**

Consonte a normativa vixente, garántese o dereito do alumnado a ser asistido e orientado individualmente e durante todo o curso académico no proceso de aprendizaxe mediante titorías.

**Artigo 3. Titorías para estudantes con discapacidade**

1. Os programas de titoría e as actividades de titoría deberán adaptarse ás necesidades dos estudantes con discapacidade, baixo a coordinación e supervisión da unidade competente na Universidade, coas adaptacións metodolóxicas precisas e, no seu caso, co establecemento de titorías específicas en función das súas necesidades. As titorías realizaranse en lugares accesibles para persoas con discapacidade.

2. O alumnado con discapacidade física, psíquica ou sensorial poderá solicitar a asignación dunha titoría permanente. Neste caso, a Dirección da Escola designará un/unha profesor/a titor/a ao longo dos seus estudos de entre o profesorado da titulación na que estea matriculado o/a estudante. A aceptación desta titorización será voluntaria para o profesorado.

#### **Artigo 4. *Publicación do horario de titorías***

A Dirección da Escola garantirá que os horarios das titorías do profesorado das titulacións impartidas na Escola de Enxeñaría Aeroespacial e do Espazo sexan publicados na web do Centro, así como nas portas dos despachos onde se realizarán as titorías antes do inicio de cada curso.

#### **Artigo 5. *Criterios para o establecemento do horario de titorías***

1. As titorías impartiranse nos días hábiles no campus de Ourense durante todo o curso segundo o calendario de actividades docentes da Universidade de Vigo (incluídos os cuadrimestres nos que o profesorado non teña docencia presencial asignada).
2. A duración das titorías, tanto para o profesorado a tempo completo como a tempo parcial, serán a que fixa a lexislación vixente.
3. Os módulos horarios de dedicación as titorías serán dun mínimo de media hora.
4. As titorías desenvolveranse no despacho que o/a profesor/a teña asignado no Campus de Ourense.
5. Cando un/unha profesor/a teña a súa docencia asignada en diferentes Campus da Universidade de Vigo desenvolverá as súas titorías segundo a proporción, redondeado a fraccións de media hora, das súas horas asignadas a materias no Campus de Ourense nun centro dese Campus.
6. O profesorado terá a posibilidade de establecer un horario de titorías diferente para cada cuadrimestre e período de docencia presencial, para adecualo mellor aos compromisos docentes, e será posible introducir modificacións neste segundo o procedemento establecido neste regulamento.
7. En principio o horario de titorías debe ser o que propoña cada profesor/a, que debe ter a posibilidade de decidir o que considere máis conveniente. Porén, para facilitar o acceso do alumnado ás titorías, deberá fixarse polo menos unha parte do horario de titorías fóra da franxa horaria coincidente cos grupos grandes dos cursos nos que o/a profesor/a teña a súa docencia, sempre que sexa posible.
8. Unha vez presentado o horario de titorías no centro, se se detectasa algún problema que poida dificultar o acceso do alumnado ás titorías ou incumprimento deste regulamento que faga que o horario non resulte axeitado, a Dirección da Escola porase en contacto co/coa profesor/a e, unha vez alcanzado un acordo entre as dúas partes, fixarase o horario.

#### **Artigo 6. *Cambios nos horarios de titorías***

1. Unha vez comezado o curso, cando un profesor ou unha profesora precise dun cambio permanente de titorías, deberá solicitalo á Dirección por escrito. Esta solicitude, unha vez aceptada, dará lugar á correspondente modificación nos sitios habituais de publicación (web, porta do despacho, etc.).

2. Cando un profesor ou unha profesora precise dun cambio puntual de tutorías, deberá notificalo ao alumnado implicado, sempre que sexa posible, con antelación suficiente, e mediante o envío dun correo electrónico ou outro medio de comunicación con acceso remoto para o alumnado implicado. Tamén deberá deixar unha nota na porta do despacho correspondiente. Na mensaxe e na nota deberase indicar a qué día e hora se cambia a tutoría.

#### **Artigo 7. *Cumprimento das tutorías e reclamacións***

1. Se despois de que un alumno espere quince (15) minutos durante o horario oficial de tutorías dun/dunha profesor/a, este non se presentara, o/a estudante poderá presentar unha reclamación utilizando un impreso dispoñible na Conserxería e na web da Escola.
2. A Dirección da Escola, ao recibir a reclamación, porase en contacto co/coa profesor/a para que aclare se estaba ou non nas tutorías, e os motivos que xustificaron a súa ausencia, de ser o caso.
3. Se a ausencia non tivera motivo xustifico, o/a profesor/a deberá indicar á Dirección da Escola que día e hora se recuperará a devandita tutoría e por que medio o comunicará ao estudantado implicado.
4. Se un/unha profesor/a, sen causa xustificada, non asiste durante un cuadrimestre a tres tutorías, a Dirección da Escola o comunicará ao Departamento do/da profesor/a, despois da cuarta ausencia a Dirección o comunicará á Vicerreitoría de Profesorado e á Secretaría Xeral da Universidade, por se estas ausencias deran lugar a algún tipo de sanción disciplinaria.